

小倉山房詩文集

冊二

小倉山房詩集卷九

西

折花詞爲陶西園作有序

西園小住隨園酒後爲余書隨園記于屏門屏後女奴阿招清臚偶觸

陶目營然欲有紫雲之請而弱于顏乃謬爲恭敬書法益工呂進士炳

星爲通其意甚婉阿招知之奮袖請行正月七日諸名士集隨園沈司

馬補蘿簪花給事中方玉川捧鏡王太守孟亭持櫬寄主人供帳具婚

畢各賦一詩

舊雨相逢話別離空山無物表相思憑君折取園花去當作河梁柳一枝

一曲更衣願也無更將郎意試官奴玫瑰淺笑西窗下道見羅敷早捋鬚

粉澤蘭熏墨數行南都人士盡催妝送香蜂蝶填橋鵲共助先生一夕忙

江郎老去生花筆書罷屏風更畫眉吩咐雲鬟好調護早朝時與晚衙時

天士呂炳星進士合番歌

天上三星明一簇入鸞鏘戛寒玉人爲呂範賦催妝我學枚臯作謀祝憶昔
綰符東海東呂郎傳經絳帳中芬芳謝覽春蘭似清瘦裴寬碧鸛同三年秩滿
賦南征魯國諸生散若星獨有蘇章偏貧筴從師直到石頭城一領欄衫馬前
拜館餐重把高賢待訟庭花落各題箋秋夜燈涼同緩帶湘簾高捲夏侯衣女
樂行觴醉似泥呵氣誰知玉謬貴留心早有貧羈妻吾妻家世琅琊宅三妹劉
家俱有適小姑居處獨無郎璇宮夜抱冰絲織椿萱堂上都無有年來阿姐如
阿母買馬須看未駕時求郎莫待登科後一枝釵綴水精珠代付檀郎寫聘書
老子仍居丈人行門生化作小姨夫鋒車北去雪霜深千里飛奴少信音闌苑
風遲燒尾宴天涯人倦看花心十年不字春將老粥粥羣雌催鵲鳥不教青桂
近嫦娥難信冰人雙目好一朝南館詠霓裳兩到蟾宮馬足香借得天錢迎織
女歸攜玉杵拜劉綱江水茫茫波又波江妃路遠愁如何老夫手指銀河路老
妻願撤妝奩助讓出空山紫竹牀隨園便是黃姑渡園中四面好樓臺三百梅
花樹樹開景龍撒帳金錢豔單伯迎姬甥館佳上元地界上元朝月帶清波水

上搖春逢佳節風都軟花對紅燈分外嬌莫學元韶弄女壻且聽庾袞訓荆條
呂郎呂郎進一卮老夫歌罷還有詞栽桃種李今朝畢管到東風結子時

哭許滄亭觀察

送別深留我歸來竟哭君咸陽遊子淚白下故人墳薄海橫馳譽湘江最勒勳
高才生衆敵餘勇整殘軍老卜金陵宅幽棲碧水濱空堂飛瓦石平地起煙雲
裙屐當筵滿笙歌鎮日聞達觀娛暮景苦志託斯文有律吹寒谷無戈挽夕曛
酒壚人冉冉花塢雪紛紛老父終天恨先生慰問勤信才三日斷手又百年分
夜雨鳴鷓鴣秋霜感鴈羣招魂呼麀尾何處召靈氛

山居絕句

草草亭臺布置餘今年真個愛吾廬牙籤都放西廊下自有斜陽來曝書

朱藤花壓讀書堂分得桐陰半畝涼新製玻璃窗六扇關窗依舊月如霜
鎮日山腰劖白雲裁量煙草話紛紛春衫不用金爐薰自向百花香裏熏
穿林繞磴問桑麻空翠無聲染素紗笑撲衣裳似蝴蝶半粘竹粉半松花

山頂樓高暮雨寒飛雲出入小闌干浮空白浪西南角收取長江屋裏看
長風高閣易生秋客散青天酒未收六代雲山孝陵樹一齊排著使人愁
雲錦淙邊折樹枝枕煙庭上寫烏絲顏含性命無勞卜表聖功勳只賞詩
青蘆葉葉動春潮堤上楊花帶雪飄滿地月明仙鶴語碧天如水一枝簫
讀書鎮日爲書忙別有清眸一寸光問我歸心向何處三分周孔二分莊
萬重寒翠盪空明四面紅牆築不成十丈籬笆千竿竹山中我自有長城
客秋此日正長途萬里歸來猿鶴呼半夜松濤聲作雨尙疑飄泊在江湖
以琴與古林禪師易竹

抱出綠綺琴換師青琅玕此琴分明出家去冰絲對月空愁嘆臨別再彈音轉
促真個絲聲不如竹明朝看竹坐清風未免感舊懷絲桐竹亦莫愁別琴亦不
離羣僧家鐘磬我家月只隔青山一片雲

卽事

吹得鶯花老東風也暫停松聲晴亦雨山色斷還青竹粉粘黃蝶荷珠瀉綠萍

張融手何物小品法華經

謝鹿詩并序

家弟保侯明府畜蘭鹿跳出籍敗其葉隨盡明府怒囚之獄子才子馳檄救之且乞之檄成無任使者杭州何西舫孝廉適至喜捧檄鑿行日朕四弓丁舁檻車至奔觸奮迅不可逼視已而入高山騰深林蹶蹶呦呦首舞至地若曰滅死竄竄且入山如太白流夜郎子瞻放僮耳也得其所哉爲詩塵明府爲得鹿者謝兼爲鹿謝

山人山居苦無偶常思得鹿如得友鹿本居山忽在官身雖宦途心否否呦呦聲中張齒牙琴堂大嚼幽蘭花使君能吏政尙猛威不及汝心咨嗟信陵公子鷄伏嗔童恢賢令虎畏神從來國法及野獸傷蘭之罪如傷人鐵鎖銀鐐牽鹿到囚之獄中獄吏笑雙角權爲園土低生芻難祭臯陶廟山中之人笑且呼馳書救鹿鹿無辜譬如將我束手板我豈肯循規矩乎求者不得得者輕世間萬事何由平山人養鹿官養蘭蘭肥鹿健兩相安主人大喜阿兄語赦書立下繫

擊鼓滿山猿鶴迎且舞誰爲嘉賓誰爲主夏麥茫茫草正青山人日日吹金笙
昨宵無夢竟得鹿滿庭雨滴芭蕉聲

雨

當窗三日雨對面一峯沉花有消魂色鶯無出樹心怒蛙爭客語新水學琴音
折竹教僮試前溪幾尺深

讀寒朗傳

楚王興大獄薄海罹災殃朝廷誅妖逆救者爲不祥賢哉寒大夫慷慨對漢皇
自言當族滅不與人共章臣見考囚時各以鍛鍊強考十連百千猶恐未精詳
陛下問公卿僉曰大聖仁罪合及五族今止及其身天下已幸甚臣等復何言
及其歸舍坐仰屋竊長歎明知覆盆冤龍鱗未敢干臣願陛下悟萬死臣亦安
寒公語未終天子顏色變急命金根車自幸洛陽殿赦出千餘人哀哀淚如霰
當時無此公青天空雷電

侵曉

侵曉巴童太爽虛驚呼雨溼北窗書小池陡長一犂雨漂出我家紅鯉魚

墾地五尺許栽禾爲戲

田小農易作開墾在須臾試此土膏美栽禾三十株新秧影太孤及長勢相扶
芄芄綠雲舒亦若懷新居未敢望收穫姑且勤畱畝下不給妻子上不輸王租
得其趣而已老農吾不如

雨後步水西亭

雨氣不能盡散作滿園烟好風何處來荷葉爲翩翩羣花浴三日意態柔且鮮
幽人傾兩耳竹外鳴新泉啁啁一鳥歇閣閣羣蛙連暝色起喬木斷虹媚遠天
蝸過有殘篆琴潤無和絃憑闌意悄然與鷗相對眠

僧房

僧房憑畫檻流目眺平原疎雨過千里夕陽紅半村風涼花氣斂室小佛香溫
昨日彈碁處苔階墮子存

積水暴流命僮建閘爲瀑布

雨停樹上聲水作溪中響溪當兩山凹奔流尤莽莽呼僮束以閘銀河隨手長
雖躍一尺布已過千人顙勢連山帶飛氣挾虹橋往花落影不留魚去叛成黨
逝者如斯夫空存濠濮想

倪素峯歸棹圖

我思作一舟其速如飛鴉不載人離別只載人歸家煙篷竹櫓作未就年年遠
客愁風沙先生持筆向我笑丹青紙上聲嘔啞夜來有夢畫有畫我今歸矣遑
知他

何西舫來看瀑布

黃梅時節掩柴荆聽得敲門踏溼迎舊雨乍來披草立新泉臨去向花鳴千枝
荷葉珠同瀉一片銀河浪有聲絕似天台結遊伴溪邊驚看石梁橫

朱草衣寒燈課女圖

牆角春深一樓兩老燕雌雛作低語草衣山人四壁空繞膝呻吟惟一女貧家
贈女無奩資只有一本周南詩女郎伊唔未上口海棠花下親教之不願女兒

通九經入宮天子呼先生只願女兒粗識字酒譜茶經相夫子阿母墳邊春草綠
阿翁吟苦家無粟恰恐春華委逝波爲兒常買三條燭讀罷殘雞膺膊鳴茅
屋一丸織女星

翁霽堂三十三山草堂圖

四海才名六十春青鞵布襪軟紅塵平生事事謙沖甚只有青山不讓人
香山溶水影迢迢綠樹橫陳葉未凋半畝草堂江上好不關門住等春潮
試罷彤廷戶不開談經重薦伏生才一時猿鶴驚相顧花外蒲輪今又來

與郭鳳池侍講秦淮話舊作

當頭新月墜纖纖十二年來吏隱兼人似孤鴻雲聚散詩如老將律嚴黃梅
雨久秦淮闊紅藕花深畫舫添料得憑欄定含睇六朝春在水晶簾

攜手雞壇五少年山河一夢酒壚邊參軍蠻語今能否海上琴聲更渺然舊雨
竟無知己賦新詩偏有悼亡篇夕陽小騎梅花影苦憶金臺掃雪天

欲續鸞膠帶雨聽風驟小住玉河亭家家短笛橫窗過日日長眉隔水青深夜

花明燈照影雕闌酒罷月當庭尋春我有藍橋路且飲瓊漿再乞靈
南州才遇郭林宗又說歸心似轉蓬墊角風標傳白下唾壺恩寵極青宮天邊
月落應思我山裏雲多不贈公遮莫題襟桃葉渡暮潮愁送夕陽紅

次日侍講納姬索詩

吹笛青溪雁影分一家人載兩船雲

侍講令兄先娶一姬

玉蓮花壓連宵雨六月深涼似

爲君

尋春甘苦我深嘗此事難於上太行剛好一枝真碧玉定情親勸汝南王

曳杖看雲歌贈張玉川

太湖白雲三萬頃有人看過五十年神仙贈與綠玉杖追雲直到湖水邊白雲
都向煙波入先生曳杖湖邊立煙波重見白雲生先生曳杖湖邊行疑是騎雲
鶴皎潔隨風落又疑雲中君飄飄白練裙誰知乃是玉川子半生腳踏長安市
長安故人不相待富者乘車貴張蓋或如麟鳳翔高天或惹驚風飄塞外不見
爲霖澤物有餘功但覺白衣蒼狗無多在長揖五侯門吳江一葉開看雲指老

眼重理舊生涯鎖雲囊製更羸手撻雲篇費蘇公才醉倒洞庭山頂最高處大呼七十二峯雲出來

瘞梓人詩

梓人武龍臺長瘦多力隨園亭榭率成其手癸酉七月十一日病卒素無家也收者寂然余爲棺殮瘞園之西偏爲詩告之

生理各有報誰謂事偶然汝爲余作室余爲汝作棺瘞汝於園側始覺於我安本汝所營造使汝仍往還清風飄汝魄野麥供汝餐勝汝有孫子遠送郊外寒永遠作神衛陰風勿愁歎

雜詩三首

仙人王子喬成仙太少年張口吸虹采乘鸞翔雲煙忽然笑天上玉齒流電光奴視黃初平羣龍罰一觴遠謫西海去霜雪風蕭蕭騎鯨不得下一日如千朝歸馭浮金房琪花開尙好深悔洩天機守口如瓶小

驚飈盪層嵐危葉隕寒露潦清察淵魚林空見狐兔肅肅霜華新赫赫金丸度

幽人傾兩耳萬籟俱非故感茲秋更清緬懷歲將暮揮戈少回光控弦無遠步
英英對白雲衡茅須汝護

洪鈞陶萬類濛濛如沙輕賴有數行字賢者垂其名國史高一尺不向卷首爭
生存已無傳奚待坵隴平白髮不可鑄黃金不能成不如飲美酒未死先冥冥

春雨樓題詞爲張冠伯作

江南九月秋雨多采菱女兒唱棹歌歌聲宛轉入雲去木葉慘慘水不波金荃
譜好何人製道是京江張公子公子滄桑四十年鄙人約略能彈指儂住錢塘
江上村錢塘作鎮李將軍乘龍壻得張延賞花燭人間第一春崔盧門第武安
家弄玉吹簫鳳引車豔豔華燈金作屋層層步障樹交花兩家門第氣如虹沉
復姮娥出月宮仙樂風高香遠近珠璣人掃路西東官銜書禿三千管釵費爭
傳百萬工自憐髮短初垂額鴨闌也看羊車客望得衣裳影半痕便成春夢三
生隔長安作隊走名場市上相逢各老蒼忝著宮袍歸索婦馬頭才拜北平王
此時金印已模糊此日華池錦尚鋪聞說霓裳家按譜有時玉女共投壺憐才

到處夸袁虎意氣公然似灌夫誰知白日堂堂去黑雲一陣風來處竇氏貪爭
沁水田石家禍起珊瑚樹魏其賓客霍家奴崑岡失火燒無數仲山父鼎孔惺
鐘曾與山河誓始終兩入星牢都脫手一朝平地躓秋風雄雞斷尾何人悟象
齒焚身自古同禍水家家欲滅難命燈誰肯續三竿罪雖全雪家何有死竟無
名骨不寒青山莊在路人遊臺榭荒涼草數邱羊侃歌姬辭故苑謝公絲竹剩
空樓門留賣帖風吹白樞過橋心水不流可憐一品令公孫曾是當年看殺人
飄泊鰥魚身一箇春雨樓中淚潛墮唱斷秋山紅豆枝曉風殘月真無那吳苑
三更烏夜啼南唐一闕家山破芳草茫茫六代煙白頭重遇柳屯田耳聾怕聽
興亡事冠伯兩耳聾手滑能調斷續絃乞食吹簫歸不得爲人權作李龜年樂府千
章韻更嬌旗亭雪小月輪高曲終酒散琵琶斷剩有秋江咽暮潮

君爲文貞公之孫總督李

衛之壻父廷作方伯家產籍沒

寄莊容可撫軍五排一百韻

辱唁思親謝開門畏路長自歸秦嶺雪翻戀讀書堂奉母身將隱懷公歆豈忘

每逢吳計吏時訊丈人行始憚西門急徐安子產良胥師平市價蕃樂阜金閭
 漢地開淳鹵周書訓羅匡小笞都檢校頌繫悉平章古戍狼烟靜新禾玉露瀼
 碑刊王穉子兩頌段文昌入耳騰清譽關心暗拍張名儒無覆餗吾道有輝光
 苦憶長安日羣遊翰墨場飛揚鴻寶殿潦倒碧雞坊草綠王孫別槐黃舉子忙
 少年文戰銳傾國飲泉狂爭勝拏相博談諧體類倡登壇拜孫策如意贈姚萇
 舞或爲鸛鵒裘時典鸛鵒兩回珠藥榜一樣姓名香同是青鴻鵠誰爲白鳳凰
 筵張燒尾宴人看狀元郎簇簇宮花好翩翩馬首昂高遷孤客館直入上清房
 園古杉如鐵松高鼠似羣雜花侵獸錦班管動琳琅濡蠟中涓侍燒梨御果嘗
 賡歌詩百韻待漏日三商笙磬原同調人天未隔疆來看南苑月借宿屋東廂
 款款人同醉遼遼夜未央九霄風忽引二鳥翼分翔傾耳鈞韶斷回頭海影荒
 金蓮摧白露銀漢隔紅牆驚馬何辭棧禪心不戀桑兒寬調禮樂卜式牧牛羊
 沐水唐東海金陵晉建康繭絲紛校括伍伯走踉蹌吏畏烏銜肉民愁鳥啄瘡
 疏絃矜古調冶貌薄時粧格竟停崔亮廷難辱范滂鵬鵬悲腐鼠雞犬別淮王

乞病風塵外，幽棲鍾阜旁。官聲存野老，世事唱迷陽。角里公超市，庚桑碣礪鄉。
青霞暫瀟洒，元豹識行藏。谷口方名鄭，中丞道姓莊。當街呵赤棒，南面坐癡牀。
戲我稱新隸，驕人說弄璋。

公以先得子自夸

繞梁歌宛轉，雜珮玉丁當。盛德癡如故，狂

奴態不妨燈燒除夕夜，佩贈小盤囊。爲索長安米，仍催白下裝。尹邢寧避面，王
貢約騰驤。寺起浮圖壁，弓彎大屈強。遽將鞍作几，妄想蟹成筐。筮日聞呼較，登
山笑乞糧。盧生重入夢，衛女不安嫖。病馬繩穿鼻，豪牛背服箱。吾皇剛北面，
彼美竟西方。腰鼓離兄弟，函關鬪虎狼。過秦非賈誼，出塞似王嫱。衫色侵中嶽，
鈴聲響北邙。從軍新樂府，行客古河梁。太華當頭墮，蓮花刺目涼。裏烝沙浙瀝，
甌脫雨淋浪。墨子書難載，羅侯債未償。守株愁白兔，枯閭厄黃楊。強逐衙官隊，
低持手板僵。陳人衣錦繡，老婦拜姑嫜。開府三秦壯，將軍五色盲。但教隨絳灌，
不見試龔黃。鴈塔慚名姓，昆池弔漢唐。毳毼遵祖鶴，來去督郵蝗。京北眉痕嫵，
終南樹色蒼。鄉書犀望月，宦局輿生牂。老父遷江左，全家別古杭。乘船六月暑，
思子九迴腸。風木悲何遽，滄桑事改常。官無三日作家有，四人亡髮亂奔蓬葆。

一珍做宋版印
腸摧勝涓湯靈椿看彷彿孝水欽悽惶郎罷驚呼罔摩敦苦憶娘麻衣關洛雨
葛履虎牢霜夾道埋車轂狂飈斷馬鞅蓼莪春草細岬岵白雲傷返舍空啼影
輿機更舉喪卜居尋近市負土出平岡恨賦原因別騷歌漫續羌深蒙金帶客
遠奠紫霞觴鴻筆書哀輓銘旌代顯揚憶雲泥耿耿感舊笛茫茫敢寄詩千字
聊當葦一航崇轅依虎阜賢弟隔南陽公弟有信守南陽銀手都如斷金心各自將當
茲春滿地遙想月明廊化雨沾芳草離愁寄海棠願言崇景德竹帛永相望

秋雨歎

癸酉九月雨聲譁一十六日脚如麻天欲壓我懼不勝月如羞面常相遮千个
滴殘湘水竹一枝泣斷芙蓉花黃雲萬頃委溝壑垂垂玉粒生青芽山中高田
尙如此其餘下田尤汙邪城中薪價長十重破籬敗葉爭搜爬牆傾瓦毀莠生
戶豈無盜賊窺室家我聞銀河從古無人決一朝水落窮流沙從此扶桑根爛
北斗傾更何人泛張騫槎我有一寸刀能剗妖蜮蠹蠹洒掃青天送日月光照六
合無纖瑕雲深苔滑不可上且聽兩部吹鳴笳